



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

24 Marsu 2014

Tribunál Distritál Baucau kondena pena prizaun tinan 15 ba arguidu kazu omisídiu agravadu

Iha loron 20 Marsu 2014, Tribunál Distrital Baucau kondena arguidu Octavio Gusmão ho pena prizaun tinan 15 tanba provadu oho mate bian Ricardo Gusmão iha 17 Agostu 2013, iha Distritu Baucau. Kazu ne'e rejista ho Númeru Prosesu; 312/Crm.C/2013 /TDB.

Tribunál prova katak arguidu ho katana taa dala ida iha vítima nia ulun parte kotuk, taa kotu kakorok, dala ida iha kabas parte loos, kotuk laran, ain loos no taa iha oin dala ida. Kazu ne'e akontese tanba vítima deve arguidu nia osan \$ 40,00 la selu durante tinan rua ona.

“JSMP preokupa dala barak ona, tanba ita nia sosiedade kuaze lakon nia sentidu respeitu ba ema seluk nia vida, no fasil teb-tebes atu termina ema seluk nia vida mesmu tanba kauza ne'ebé simples teb-tebes. JSMP rekoñese iha área rural osan ho folin hanesan ne'e nia valor ass no influensiadu teb-tebes maibe sei iha dalan ne'ebé seguru liu atu rezolve. JSMP espera katak desizaun ida ne'e bele eduka ema seluk atu tauk no hadok aan husi krime hasai ema seluk nia vida,” dehan Luis de Oliveira Sampaio, Diretór Ezekutivu JSMP.

Iha 18 Marsu 2014, semana hanesan, Tribunal Distritál Suai liu hosi julgamentu móvel iha Maliana, kondena mos arguidu sira ba krime ho natureza omisídiu agravadu ne'ebé akontese iha Sub-distritu Atabae, Distritu Bobonaro.

Akontesementu sira ne'e, lolos bele minimiza kuandu ema hotu konsiente atu buka meus pasífiku hodi buka rezolve sira nia problema.

JSMP kontinua rekomenda ba entidade estadu atu halao kampaña konsensializasaun no edukasaun sívika ne'ebé klean no regular kona-ba importânsia husi ema seluk nia vida no aprosimasaun ba rezolusaun konflitu iha sosiedade.

Ministériu Públiku akuza katak iha 17 Agostu 2013, vítima ba husu nia osan \$ 40,00 ne'ebé arguidu impresta durante tinan rua ona. Vítima tolok no taa arguidu, maibé la kona, nune'é arguidu hadau fali katana hodi taa fali vítima iha ulun fatuk parte kotuk, taa kotu vítima nia kakorok, taa iha kabas parte los, taa iha kotuk laran, taa iha ain parte los no iha oin. Konsekunsia husi aktu ne'e rezulta vítima mate kedas iha fatin akontesimentu.

Relasiona ho aktu ne'e, Ministériu Públiku akuza arguidu kontra artigu 139 Kódigu Penal kona-
ba omisídiu agravadu ho moldura penal tinan 12 too 25.

Prosesu lee akordaun ne'e lee husi juís Dr. Jose Gonçalves, ne'ebé representa juís koleтиву.
Ministériu Públiku representa husi Dr. Aderito Tilman no arguidu hetan defeza husi Dr. Jonas
Henrique da costa.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaune-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl